

四庫全書

史部

欽定四庫全書

弇山堂別集卷八十一

明 王世貞 撰

科試考一

國家初起右武其於文事亦不數數焉大要各以其途
進然庚戌詔見天子意在矣百餘年來日以益重非從
此出者多見擯異途不輒當要津此豈一朝一夕哉作
科試考

初設科舉條格詔

洪武三年五月初一日奉天承運皇帝詔曰朕聞成周之制取材於貢士故賢者在職而其民有士君子之行是以風俗淳美國易為治而教化彰顯也漢唐及宋科舉取士各有定制然但貴詞章之學而未求六藝之全至於前元依古設科待士甚優而權豪勢要之官每納奔競之人辛勤歲月輒竊仕祿所得資品或居士人之上懷材抱德之賢恥於

並進甘隱山林而不起風俗之弊一至於此今朕統一
中國外撫四夷與斯民共享昇平之治所慮官非其人
有傷吾民願得君子而用之自洪武三年八月為始特
設科舉以取懷材抱德之士務在經明行修博古通今
文質得中名實相稱其中選者朕將親策於廷觀其學
識品其高下而任之以官果有材學出衆者待以顯擢
使中行文武皆由科舉而選非科舉毋得與官敢有遊
食奔競之徒坐以重罪以稱朕責實求賢之意所有合

行事宜條列於後

一鄉試會試文字程式

第一場試五經義各試本經一道不拘舊格惟務經旨通暢限五百字以上易程朱氏註古註疏書蔡氏傳古註疏詩朱氏傳古註疏春秋左氏公羊穀梁胡氏張洽傳禮記古注疏四書義一道限三百字以上

第二場試禮樂論限三百字以上詔誥表箋

第三場試經史時務策一道惟務直述不尚文藻限

一千字以上

第三場畢後十日面試騎觀其馳驟便捷射觀其中
數多寡書觀其筆畫端楷律觀其講解詳審

殿試時務策一道惟務直述限一千字以上

一出身

第一甲第一名從六品第二第三名正七品賜進士
及第

第二甲一十七名正七品賜進士出身

第三甲八十名正八品賜同進士出身

一鄉試各省并直隸府州等處通選五百名為率人材衆多去處不拘額數若人材未備不及數者從實充貢

河南省四十名山東省四十名山西省四十名陝西省四十名北平省四十名福建省四十名江西省四十名浙江省四十名湖廣省四十名廣西省二十名在京鄉試直隸府州一百名

一會試額取一百名

一高麗國安南占城等國如有經明行修之士各就本國鄉試貢赴京師會試不拘額數選取

一開試日期

鄉試八月初九日第一場十二日第二場十五日第三場

會試次年二月初九日第一場十二日第二場十五日第三場

殿試三月初三日

一三年一次開試

一於洪武三年鄉試洪武四年會試

一各省自行鄉試其直隸府州赴京鄉試凡舉各具籍貫年甲三代本姓鄉里舉保州縣申行省印卷鄉試中者行省咨解中書省判送禮部印卷會試

一仕宦已入流品及曾於前元登科并曾仕宦者不許應試其餘各色人民并流寓各處者一體應試

一有過罷閒人吏娼優之人並不得應試

一應舉不第之人不許誼開撫拾考官及擅擊登聞鼓
違者究治

一凡試官不得將弟男子姪親屬徇私取中違者許赴
省臺指實陳告

一科舉取士務得全材但恐開設之初騎射書算未能
徧習除今科免試外候二年之後須要兼全方許中選
於戲設科取士期必得乎全材任官惟能庶可成

於治道咨爾有衆體朕至懷故茲詔示想宜知悉
按洪武三年庚戌始開科就試者鄉舉士百二十三人
中式者七十二人主試則御史中丞劉基治書侍御史
秦裕伯同考則翰林侍讀學士詹同弘文館學士睢稼
起居注樂韶鳳尚寶丞吳潛國史編修宋濂而序錄出
於濂中式士未及會試悉授官

四年京畿鄉試兵部尚書吳琳國子司業宋濂濂仍為
序尋合諸省之士會試凡二百人中式者百二十人知

貢舉官特進中書省右丞相忠勤伯汪廣洋左丞相胡
惟庸主文禮部尚書陶凱前翰林侍講學士潘庭堅考
試翰林侍讀學士詹同國子司業宋濂吏部員外郎原
本前貢士鮑恂掌院吏部右侍郎顧貞監試御史孔希
魯宋主提調兼印卷禮部尚書楊訓文同印卷中書左
司郎中孫煜祖提調禮部侍郎秦文繹禮部主事姜漸
受卷吏部主事林光弼彌封兵部主事許方騰錄蘇州
教授貢穎之對讀翰林應奉文字唐肅禮部主事張孟

兼此外又有監門搜檢巡綽鎮撫供給主事及掌行科
舉文字省掾令史供給奏差等官廷試總調則前汪廣
洋胡惟庸讀卷祭酒魏觀博士孫吾與給事中李顧修
撰王僕監試御史馬貫徐汝舟掌卷工部員外郎牛諒
受卷工部主事周寅彌封秘書監丞陶誼對讀尚寶丞
魏潛編修蔡玄提調前陶凱楊訓文以官品考之尚書
祭酒正三品侍郎侍讀學士正四品給事中從四品左
司郎中司業正五品員外正六品主事應奉修撰正七

品編修秘書正八品

是歲取中俞友仁等廷試賜吳伯宗郭翀吳公達俱及第狀元授員外郎餘及出身俱授主事同出身授縣丞會元亦授縣丞高麗生入試者三人唯金濤登三甲第五授東昌府安丘縣丞餘皆不第三人俱以不通華言請還本國詔厚給道里費遣舟送之濤尋為其國相儒籍中者六十三人

六年諭中書省臣有司所取多後生少年觀其文詞若

可有為及試用之能以所學措諸行事者甚寡朕以實心求賢而天下以虛應朕非朕責實求賢之意也今各處科舉宜暫停罷別令有司察舉賢才必以德行為本而文藝次之

是年遂詔天下舉人罷會試正月初八日河南解額內選四名第一人張唯年二十七其次王輝年二十八李端年二十一張翀年二十七二十三日山東解額內選五名第一人王璉年二十三其次張鳳年二十八任敬

年二十六陳敏年二十三馬亮年二十五皆拜翰林編修又選國子監蔣學方徵彭通宋善王惟吉鄒傑等拜給事中於文華堂肄業命太子贊善大夫宋濂太子正字桂彥良分教之

十七年三月戊戌朔命禮部頒行科舉程式凡三年大比子午卯酉年鄉試辰戌丑未年會試舉人不拘額數從實充貢鄉試八月初九日第一場試四書義三道每道二百字以上經義四道每道三百字以上未能者許

各減一道四書義主朱子集註經義詩主朱子集傳易
主程朱傳義書主蔡氏傳及古註疏春秋主左氏公羊穀
梁胡氏張洽傳禮記主古註疏十二日第二場試論一
道三百字以上判語五條詔誥章表内科一道十五日
第三場試經史策五道未能者許減其二俱三百字以
上次年禮部會試以二月初九日十二日十五日為三
場所考文字與鄉試同鄉試直隸府州縣則於應天府
在外府州縣則於各布政司其舉人則國子學生及府

州縣學生員之學成者儒士之未仕者官之未入流者
皆由有司申舉性資敦厚文行可稱者應之其學校訓
導專教徒及罷閒官吏倡優之家與居父母喪者並不
許入試其中式者官給廩傳送禮部會試考試官皆訪
經明公正之士官出幣帛先期敦聘主文考試官二人
文幣各二表裏同考試官鄉試四人會試八人文幣各
一表裏提調官在內鄉試應天府官一人會試禮部官
一人在外布政司官一人監試官在內監察御史二人

在外按察司官二人供給官在內應天府官一人在外
府官一人收掌試卷官一人彌封官一人謄錄官一人
對讀官四人受卷官二人皆擇居官之清慎者充之巡
綽監門搜檢懷挾官四人在內從都督府委官在外從
守禦官委官凡供用筆札飲食之屬皆官給之舉人試
卷自備每場草卷正卷各用紙十二幅首書三代姓名
及其籍貫年甲所習經書在內赴應天府在外赴布政
司印卷會試殿試赴禮部印卷試之日黎明舉人入場

每人用軍一人守之禁講問代冒至晚納卷未畢者給
燭三枝文字迴避御名廟諱及不許自叙門地彌封者
編號作三合字謄錄者用硃考試官用墨以防欺偽其
會試中式者三月朔日赴殿試

是秋九月應天府奏中式者廖孟瞻等二百二十九人
按雙槐歲抄云內多國子生上悅命有司出榜原籍旌
之

十八年乙丑會試命待詔朱善前典籍聶鉉為考試官

取黃子澄第一練子寧次之花綸又次之綸浙江解元也及廷試綸第一子寧次之子澄又次之既啟封上自以夢故用丁顯為狀元子寧如故綸第三抑子澄三甲為庶吉士然三人俱授修撰亡何亦擢子澄為修撰云見刻丁顯策者僅三百字稱上為上位餘多不成語實錄云賜二甲進士馬京等為編修吳文為檢討李震為承勅郎陳廣為中書舍人三甲危璫為衛府紀善李鳴岡為潭府奉祠正楊靖為吏科庶吉士黃耕為承勅郎

蹇瑫等為中書舍人鄒仲實為國子助教其諸進士觀政翰林院承勅監近侍衙門者采書經庶常吉士之義俱稱庶吉士六部俱稱進士

是歲沈潛楊靖咸受上知不兩歲至兵刑部尚書而皆不克終蹇瑫改名義授中書舍人滿九載潛靖死後始進官而為吏部尚書者三十四年俞憲登科攷名姓次序俱以會試錄為準然不載楊靖蹇瑫其脫略可知矣二十一年戊辰會試命翰林院編修蘇伯衡李叔荆為

考試官取中施顯等廷試擢任亨泰第一命有司於襄陽建狀元坊以旌之亨泰甚被上寵任每名議手書襄陽任而不名後自禮書謫御史不知所終第二人卓敬第三人盧原質原質方孝孺之姑子十年而為太常少卿

按是歲解縉年十九中三甲進士考年譜志銘俱云改中書庶吉士與姊夫黃金華同而實錄內絕不載其事實錄為縉總裁豈應刪略至此蓋縉得罪後以重修故

去之耳題名記盧原質卓敬以死難磨去不存

二十三年庚午賜應天府考試官傅箕蘇伯衡謝南毛
瀚鈔各十錠中式舉人黃文史等五十人各二錠其監
生生員試不中者鈔二貫且諭以進學之方俾無怠無
忽

二十四年辛未天下會試者六百六十人取中許觀等
三十一人廷試仍賜許觀第一時年二十八張顯宗次
之吳言信又次之上以連科狀元出太學召祭酒宋訥

面褒焉

是歲復擢下第舉人張孟鏞等為主事

二十七年甲戌取中彭德等廷試賜張信及第信定海人為侍讀後坐以教韓王寫杜詩含譏刺及策稿削御製二語得罪後坐考試事誅彭亦坐事除名

三十年丁丑會試命翰林院學士劉三吾吉府紀善白信蹈為考試官取宋琮等五十一人廷試賜閩縣陳郊為首吉安尹昌隆會稽劉諤次之時大江以北無登第

者下第諸生上疏言三吾等南人私其鄉上怒命儒臣
再考落卷中文理長者第之於是侍讀張信侍講戴晏
右贊善王俊華司直郎張謙司經局校書嚴叔載正字
董貫長史黃章紀善周衡蕭揖及郊昌隆諤人各閱十
卷或言劉白囑信等以陋卷進呈上益怒親賜策問擢
韓克忠王恕焦勝等六十一人及第有差授第一名韓
克忠為翰林修撰第二名王恕為編修第三名焦勝為
行人司副進士陳性善為行人陳誠為檢討考信等俱

磔殺之三吾以老戍郊謫安置威虜唯赦戴彛尹昌隆
郊謫取回為司賓司儀署丞復殺之宋琮拜御史後以
檢討掌助教致仕

建文二年己卯命文學博士方孝孺太常少卿高巽志
主應天試取中劉政等政後以兵變不食死

三年庚辰命會試禮部左侍郎兼學士董倫太常少卿
高巽志為考試官取中吳溥等王良策第一以貌不及
胡廣又廣策多斥親藩遂擢廣第一改名靖良為第二

是歲得人最盛如胡及二楊胡濙俱登顯要為時名臣而良能夠節尤可重也

命禮部乙榜舉人署教諭訓導事者給俸三年入禮部試試中計所教人得中鄉試就進士出身資格遞陞一級否從本級其下第而所教人中鄉試者與實授九年通考稱職平常不稱職黜陟否仍署職減俸十之五乙榜年未三十不願署教者聽

永樂二年甲申會試命侍讀學士解縉侍讀黃淮為考

試官取禮樂制度為問欲以求博洽之士唯曾棨卷記
獨詳上喜御批貫通經史識達天人有講習之學有忠
愛之誠擢魁天下昭我文明尚資啟沃惟良顯哉第二
第三人周述周孟簡從昆季也亦皆有御批褒許之辭
至謂兄弟齊名古今罕比授修撰編修等官仍於二甲
擇文學優長楊相等五十一人及善書湯流等十人俱
改翰林庶吉士進學賜棨與述孟簡羅衣各一襲五月
擢庶吉士杜欽王惟正鄭慶為戶科給事中周玉羅亨

信張伺為工科給事中又命翰林院試下第舉人張欽
等六十一人名見皆賜冠帶命於國子監進學以俟後
科且勉以立志謂爾等學已有根但更百尺竿頭進步
爾後科第一甲人有不在爾曹者乎至次年正月復命
學士縉等庶吉士楊相劉子欽彭汝器王英王直余鼎
章敞王訓柴廣敬王道熊直陳敬宗沈升洪順章朴俞
學夔羅汝敬廬翰湯流李時勉段民倪惟哲袁天祿吾
紳楊勉及榮等二十八人於文淵閣肄業時人謂之二

十八宿進士周忱自陳年少願進學上喜曰有志之士也命增入之司禮監月給筆墨紙光祿給朝暮膳禮部月給膏燭鈔人三錠工部擇近第宅居止是歲人知選二十八人不知初為六十一人也

是科自曾棨等三名外得留者僅王英王直二人而至八座者亦僅二王及周忱耳陳敬宗李時勉皆已授官而復入者

三年乙酉翰林院學士王景侍讀學士王達主應天試

四年丙戌命翰林院侍讀學士王達司經局洗馬兼翰林院編修楊溥為考試官取中朱縉等廷試賜林環陳全劉表及第改進士江殷胡啟先孫迪張叔豫李岳潤陳孟潔張文選鄭復言曾春敬蕭福曹閻盧永黃獻為庶吉士

是歲仍取乙榜舉人廷試擢周翰等三人進學翰林餘除學官

六年戊子命翰林院修撰李貴檢討王洪主應天試

七年己丑命翰林院侍講鄒緝左春坊左司直郎徐善述為考試官取中陳璉等皇太子以副榜第一名孔諤為左春坊左中允賜出身御史劾出題孟子節文尚書洪範九疇偏題緝等俱下獄又復取下第胡棨金庠等十餘人時上幸北京俱寄國子監讀書至辛卯始廷試賜蕭時中苗衷黃暘及第俱為修撰改進士楊慈劉永清陳璉錢習禮黃壽生陳周俱為庶吉士鍾英張習張試馬信邵聰初為國子生選入翰林習譯書至是中進

士亦改庶吉士

九年辛卯翰林院學士兼左春坊大學士胡廣右春坊右庶子兼翰林侍講楊榮主應天試

十年壬辰命左春坊左諭德翰林院侍講楊士奇右諭德兼侍講金幼孜為考試官取中林誌等廷試賜馬鐸林誌王鈺及第其進士原在翰林習譯書者蔣禮趙昂徐俊何賢潘勤黃裳羅興楊榮張觀馬玉馬訓王璜劉濬胡讓邵進來顯方復俱改庶吉士林誌福建解元也

十二年甲午北京行部請鄉試始命翰林院侍講曾榮翰林院侍講兼左春坊左中允鄒緝主之

皇太子命司經局洗馬兼翰林編修楊溥編修周述主應天試

十三年乙未始詔天下舉人會試北京命翰林院修撰梁潛王洪為考試官初拆卷得第一名曰陳循其鄉人也避嫌改置第二而擢李文祐既又以祐字難識定洪英為第一第五名王翱者鹽山人也上喜得畿輔士以

布衣名見賜酒食既廷試復賜陳循及李貞陳景著及
第景著時年十八改進士洪英王勰林文結宋魁陳鏞
曾弘林道節胡靚章文昭嚴珊金開王英鄭洛袁璞周
崇厚習侃鄭雍言牟倫呂蒙張英黃仲芳廖謨宋琰朱
杲范琮黃璫陳文璧高穀張堅沈暘及原習譯書王懋
姚昇胡清方勉林超曹義龔英時永彭麟益陳坤奇李
芳葉潁王士華吳紹生丁毅石玉黎民張遊萬完周貴
連智王諭樊敷王麟戴覲許彬徐景安石慶鄭猷李冠

祿周安謝暉為庶吉士

是年內閣左庶子兼侍講楊榮右諭德金幼孜尚列大理寺丞馬麟後

十五年丁酉北京行部請鄉試命翰林院侍講左春坊左中允鄒緝侍講王洪主之尋出王洪為主事改命侍講王英

皇太子命翰林院侍講兼右贊善梁潛侍講陳全主應天試

十六年戊戌會試命行在翰林院侍讀學士曾察侍講
王英為考試官取中董璘等廷試賜李騏劉江鄧珍及
第騏初名馬上自改之唱名莫有應者上為道其故乃
出應取進士周叙董璘楊珙褚思敬尹鳳岐陳詢徐律
習嘉言王寅胡文善周懋昭王暹雷遂莫珪孔友諒秦
初為庶吉士

十八年庚子命左春坊左中允無行在翰林院侍講鄒
緝侍講王英主順天試

皇太子命翰林院修撰張伯頴左春坊左贊善兼編修
陳仲完主應天試

十九年辛丑命左春坊大學士楊士奇翰林院侍講周
述為考試官取中陳中等廷試賜曾鶴齡劉矩裴綸及
第取原習譯書進士衛恕陳融溫良姚本張恕萬碩黃
澍楊鼎玉璉李學吳得全朱子福王振蔣謙韋昭為庶
吉士

二十一年癸卯命翰林院侍講王英翰林院修撰林誌

主順天試

命

闕

主應天試

二十二年甲辰命翰林院侍讀學士曾棨侍講余鼎為
考試官取中葉思等廷試賜邢寬梁湮孫曰恭及第初
上取第一孫曰恭嫌其名近暴曰孫暴不如邢寬遂擢
寬第一仍用朱書填黃榜一時稱異事云取進士徐賢
何志薛理李芳蔡英葛陵等為庶吉士

宣德元年丙午命左春坊左諭德林誌翰林院侍講余

學夔主應天試上親征漢王順天不及試

二年丁未命行在太常寺卿翰林院學士楊溥左春坊大學士兼翰林院侍讀學士曾榮為考試官取中趙鼎等廷試賜馬愉杜寧謝璉及第命進士江玉琳等九十
六人歸家進學原譯字邢恭為庶吉士

四年己酉命左春坊左庶子兼翰林院侍讀學士王直翰林院侍讀李時勉主順天試

命翰林院侍讀錢習禮翰林院修撰劉永清主應天試

五年庚戌命左春坊大學士兼行在翰林院侍講學士
王英翰林院侍讀錢習禮為考試官取中陳紹等廷試
賜林震林文龔錡及第選薩琦逢端葉錫陳璣林補王
振許南傑江淵為庶吉士給酒饌房舍月賜燈油鈔一
如永樂甲申例復命兵部與皂隸人賜文綺衣一襲鈔
三百貫命學士王直教習是歲試錄禮部尚書稱總提
調兼知貢舉革掌行科舉文字諸執事官由舉人者皆
稱貢士震福建解元又會試第二人也

七年壬子命左春坊左庶子兼翰林院侍讀周述翰林侍讀錢習禮主順天試

命行在翰林院侍讀學士李時勉侍讀苗衷主應天試是歲九月順天府尹李庸檢舉科場詐冒事御史楊懷給事中虞祥等劾奏庸及監試等官御史梁廣成等罪上命姑宥之已而顧侍臣曰科舉求賢國家重事於此而不用心他事可知已御史給事中所劾本不可宥但念斯事因庸覺察不然奸弊不克露矣

八年癸丑致仕少保戶部尚書武英殿大學士黃淮以
謝恩至京命與詹事府少詹事兼翰林侍讀學士王直
為考試官取中劉哲等廷試賜曹鼐趙恢鍾復及第先
鼐舉貢士為學官上書願得一劇職自効改太和典史
以解糧至京請與試許之中第二人廷試復第一人十
年之內入閣輔政矣上復命內閣禮部選進士及乙榜
年少質美者得進士尹昌黃璿趙智陳雲傳綱黃回六
人為庶吉士乙榜龍文章謹李滄梁蔡黃平陳韶田鈞

李蒲王鑑朱奎袞和林同柴同恩張承翰陳康龔理相
佐黃輿李柰王佐鄭觀胡如暘趙象蔣榮祖二十四人
送國子監庶吉士令王直教習賜居第給酒饌燈油鈔
龍文等賜冠帶給訓導俸以待下科會試翰林院三月
一考其文至十一月復選進士徐瑄賴世隆吳節李紹
姜洪虞瑛潘洪王玉陳金劉實鄭建方熙何瑄為庶吉
士亦命王直教之

十年乙卯命翰林院侍讀學士李時勉翰林院侍講高

穀主順天試

命左春坊左庶子兼翰林院侍讀周述翰林院侍讀苗衷主應天試

正統元年丙辰少詹事兼翰林院侍讀學士王直翰林院侍講學士陳循為考試官取中劉定之等廷試賜周旋陳文劉定之及第或云首揆既取三卷未定問同事者曰有識周旋者否狀何如或曰白而偉蓋疑謂淳安周瑄也遂首旋既傳臚貌甚寢為之愕然同考太常少

卿魏驥循師也官秩尊於循改王鑑劉越余忭王尚文
伊侃李振王忠王偉徐珪秦瑛古鏞顧睢雷文為庶吉
士少詹事王直王英教之

是歲詔增鄉試會試取士額先是祭酒陳敬宗言比者
解額有定副榜數少以致天下教官類多缺員吏部遂
建議兼考監生補除教職往往僥倖選列不稱師範竊
以為縱科舉取人之濫猶愈於監生考試之精請量寬
解額專取之於副榜庶幾誨道得人賢才無滯於是行

在禮部議增會試為百五十人順天府近已增至八十人其應天浙江等處各增舊額有差上定順應天滿百人浙江福建皆六十人江西六十五人河南廣東皆五十人湖廣五十五人山東四川皆四十五人陝西山西皆四十人廣西三十人雲南二十人其監生學業無愧者仍除教職

順天府尹姜濤奏本府八月鄉試例取舉人八十名近者浙江等布政司并應天府舉人俱視常例有增順天

府仍舊然本府與應天府俱有監生并各處儒士吏典
應試乞准應天府例增二十名從之

三年戊午命翰林院侍讀學士曾鶴齡翰林院侍讀洪
璵主順天試

命翰林院學士錢習禮翰林院侍讀陳詢主應天試
是歲順天初試之夕場屋火旋滅試卷有殘缺者有司
懼不敢請更試欲請修場屋以終後兩試鶴齡曰必更
試然後可以滌弊而不枉士子有司具二說以進詔更

試日

四年己未命行在禮部左侍郎兼翰林院侍讀學士王
直行在翰林院學士錢習禮為考試官取中楊鼎等廷
試賜施槃楊鼎倪謙及第槃時年二十三不久卒楊鼎
陝西解元

六年辛酉命

闕

主順天試

命翰林院侍讀學士陳循翰林院侍講陳用主應天試
七年壬戌命禮部左侍郎兼翰林院侍講學士王英翰

林院侍讀學士苗衷為考試官取中姚夔等廷試賜劉儼呂原黃諫及第

是歲同考則有永新知縣陳員韜京衛武學教授紀振俱進士岐陽教諭彭舉中式十二名都察院吏三十三名南昱刑部吏一百二十一名鄭溫松陵驛丞

九年甲子命

闕

主順天試

命

闕

主應天試

十年乙丑命翰林院學士錢習禮侍講學士馬愉為考

試官取中商輅等廷試賜商輅周洪謨劉俊及第輅浙江解元也本朝中三元者惟輅一人

是歲同考一教授二教諭又水東日記云是科會試登科錄天字皆稱茂字今考部本不然以為葉傳聞之誤葉是科進士豈有誤理或本部翻刻未可知也廷試讀卷有兵部尚書徐晞戶部侍郎掌光祿寺柝亭俱吏員也

十二年丁卯命翰林院侍讀習嘉言翰林院侍講邢寬

主順天試

命翰林院侍講王一寧檢討錢溥主應天試

十三年戊辰命工部右侍郎兼翰林院學士高穀侍講杜寧為考試官取中岳正等廷試賜彭時陳鑑岳正及第

是年同考二教諭一訓導辦事官舒庭模中一百二十五名改萬安曹鼎熊璣劉吉孫茂劉珣王勤謝環田行順李泰宋弼邢讓劉清喬毅李本鏞王恕孫昱孟祥曹

輔韓敏尹旻張斐李鑽李寬華顯霍榮郭安李堅成章
為庶吉士命侍讀習嘉言侍講王一寧編修趙恢教習
後補命侍講劉鉉修撰王振

是歲登科錄李泰書父永昌司禮監太監又讀卷官太
常少卿程南雲乃習書字人

唱名日當呼第一名彭時不見上候之長久始至特釋
之明年八月時以修撰入內閣預機務

是年讀卷戶部右侍郎兼學士陳循列於戶部左侍郎

柰亨後右都御史掌鴻臚寺楊善亦守城生員

景泰元年庚午命翰林院侍講學士劉鉉翰林院侍講
陳文主順天試

命翰林院侍講吳節劉定之主應天試

二年辛未命戶部右侍郎兼翰林院學士江淵翰林院
修撰林文為考試官取中吳滙等廷試賜柯潛劉昇王
僎及第改進士吳滙周輿戚濶張永呂晟王獻劉宣俞
欽相傑楊守陳童緣張業樊冕林孔滋張瑄金文鍾清

田斌章表楊杲彭信劉泰江朝宗為庶吉士俱於東閣
讀書

是年讀卷工部尚書學士高穀以內閣列本部尚書石
璞後閣體猶未重也

先是戶科給事中李侃等奏今年會試禮部奏准取士
不分南北臣等竊惟江北之人文詞質實江南之人文
詞豐贍故試官取南人恒多北人恒少洪武三十年太
祖高皇帝怒所取之偏選北人韓克忠等六十一人賜

進士及第出身有差洪熙元年仁宗皇帝又命大臣楊士奇等定議取士之額南人十六北人十四今禮部妄奏變更意欲專以文詞多取南人乞勅多官會議今後取士之額雖不可拘而南北之分則不可改刑部侍郎羅綺亦以為言事下禮部以為頃者詔書科舉自景泰元年為始一遵永樂年間例行本部查得永樂二十年間凡八開科所取進士皆不分南北已經奏允今侃稱禮部變更意專以文詞多取南人夫鄉舉里選之法不

可行矣取士若不以文考官將何所據且北方中土人才所生以古言之大聖如周公孔子大賢如顏曾思孟皆非南人以今言之如靖遠伯王驥左都御史王翱王文皆永樂間不分南北所取進士今豈可預謂北無其人況本部止遵詔奏書行即不魯奏請多取南人少取北人今各官所言如是乞勅翰林院定議命遵詔書行侃等所言不允

是歲知貢舉官胡濙楊寧二尚書同考侍講劉儼秩尊

於林文又有廣東叅政羅崇本教授訓導各一廷試王
越卷為風飛去上復給卷足成之或云墮於朝鮮次歲
送還上喜擢越御史

弇山堂別集卷八十一

欽定四庫全書

弇山堂別集卷八十二

明 王世貞 撰

科試考二

四年癸酉命太常少卿兼翰林院侍讀學士陳詢侍講學士兼右春坊右中允呂原主順天試

禮部祠祭司主事周騏奏設科取士當遵國法禁例洪武以來舊例曾由科目出身未入流品官生員發充吏

罷閒官吏監生生員娼優隸卒刑喪過犯之人不許入試其生員軍生儒士及未入流品官農吏承差軍餘人等若無錢糧等項粘帶者聽從入試如有不實照例論罪已中式者黜退不錄未中式者終身不許入試今順天府景泰四年鄉試取中舉人尹誠汪諧陳益龔滙王顯李隨李森錢翰俱係冒籍人數於例不該入試似此之徒欲求事君而先欺君今日苟圖如此他日居官可知乞明正其罪以警將來命錦衣衛俱執送刑部問未發

露者許出首逮問同學知而不首者同罪今後科場知貢舉監試提調等官務在防範嚴切不許容情冒名換卷截卷傳遞文字并說話作弊監門搜檢巡綽監試官軍敢有如前容隱不舉作弊者俱治以重罪兼外執事官臨期於吏部聽選文學出身者充之

命左春坊大學士兼翰林院侍讀彭時右春坊右庶子兼侍講趙恢主應天試

五年甲戌命兵部左侍郎翰林院學士左春坊大學士

商輅司經局洗馬兼翰林院修撰李紹為考試官取中
彭華等廷試賜孫賢徐溥徐轄及第選進士丘濬耿裕
彭華劉鈺陳龍牛龍馬勲何琮吳禎嚴淦尹直陳政寧
珍馮定金紳黃甄王寬夏時為庶吉士命左春坊大學
士劉儼教習先一年禮部尚書胡濙言翰林院及春坊
以文藝為職業宜專作同考京官由科第有學行者宜
兼職以充勿再用教官著為令許之是歲商學士才閔
三科已作正考而同考則中允楊鼎贊善錢溥皆已未

也登科錄牛輪書叔玉司禮監左監丞

七年丙子太常寺少卿兼翰林院侍讀劉儼左春坊左中允兼翰林院編修黃諫主順天試

內閣大學士陳循王文等言考中譯字官劉淳送試不中為失舊制詔儼等回話宥之王文陳循又言循子瑛父子倫不中式為考官忽畧之故又出題偏駁犯宣宗御諱詔禮部同大學士高穀等覆驗取中舉人徐泰等文卷有優于倫瑛者有相等者有不及者又第六名林

挺硃卷無批語奏上有旨劉儼等考試不精罪不容逃
但無私弊俱宥之林挺并諒房考官俱下錦衣衛獄鞫
問情實以聞王倫陳瑛明年俱准會試六科論劾循文
罪當誅斥有旨覽爾等所奏誠為有理但陳循王文輔
導有年國之元老豈可以一事之失而遽加之罪姑貸
之少保高穀乞致仕詔卿持正之心嫌疑之情朕已具
悉但館閣之職正當用賢不允所請今後尚加秉忠直
以全名節蓋穀面斥循文之私而奏全儼等不自安乃

有此奏也

命司經局洗馬兼翰林院修撰柯潛左春坊左贊善兼翰林院編修劉俊主應天試

天順元年丁丑命禮部左侍郎兼翰林院學士薛瑄通政司左參議兼翰林院侍講呂原為考試官取中夏積等廷試賜黎淳徐瓊陳秉忠及第

是歲同考則尚寶少卿錢溥司丞李泰翰林典籍徐秘蓋官制初變也是科最號嚴整然外人有以俚語戲者

所謂薛瑄性理難包括錢溥春秋沒主張問仁既已無
顏子告祭如何有太王皆指摘題目之誤至謂總兵令
姪獨軒昂蓋指石亨從子後也後坐亨敗除名及以怨
謗劄於市

廷試讀卷官凡三伯武功掌內閣靖遠掌兵部興濟掌
鴻臚

三年己卯命翰林院學士劉定之倪謙主順天試謙有
門生不中式為所訐陷謫戍

命翰林院侍讀學士錢溥侍講萬安主應天試

四年庚辰命翰林院學士呂原尚寶少卿兼翰林院修撰柯潛為考試官取中陳選等廷試賜王一夔李永通鄭環及第一夔後改姓謝改進士劉健張賑李溫張謹德張順周經王範蔡霖張溥楊瑛鄭紀童璿汪諧張元禎為庶吉士命學士劉定之侍讀學士錢溥教習

是科閻禹鈞以國子監學正同考有下第舉人訴學士呂原等徇私顛倒上試之皆不稱囊三木禮部前以徇

六年壬午命翰林院修撰陳鑑修撰劉宣主順天試

命翰林院修撰劉吉翰林院檢討邢讓主應天試

七年癸未命禮部左侍郎兼翰林院學士陳文尚寶司少卿兼修撰柯潛為考試官試日大火焚死者九十餘人及主試官俱越牆免上憐之贈死者俱進士出身改試期以八月命太常少卿兼學士彭時侍讀學士錢溥取中吳鉞等八年甲申廷試賜彭教吳鉞羅璟及第吳後改姓陸踰月改李東陽倪岳謝鐸張敷華陳音焦芳

汪滋郭璽計禮傳瀚張泰吳希賢劉大夏劉道王澄董
齡杜懋史芳為庶吉士命太常少卿兼侍讀劉定之學
士柯潛教習李東陽年十八先以奇童薦讀中秘書倪
岳年二十學士謙子

成化元年乙酉命太常寺少卿兼翰林院侍讀學士吳
節翰林院學士柯潛主順天試

命翰林院侍讀丘濬編修彭華主應天試

二年丙戌命太常寺少卿翰林院侍讀學士劉定之翰林

院學士萬安為考試官取中章懋等廷試賜羅倫程敏政陸簡及第是月改進士林瀚劉鈺章懋李傑翟瑛陸淵之黃仲昭謝文祥李溶張誥畢瑜宋應奎邵有良商良臣鄭巳張鈍章益何純莊景鍾晟王俊石淮施純王偉為庶吉士命翰林院學士劉定之柯潛教習

是歲羅倫以上疏論閣臣李賢不奔喪久之章懋莊景黃仲昭以諫元宵燈火俱得罪外謫時號翰林四諫又是歲會試五經各刻文三篇二場刻詔商良臣輅子也

敏政李賢壻

四年戊子命詹事府少詹事兼翰林院侍講學士李泰翰林院侍讀彭華主順天試

命翰林院侍讀學士陳鑑翰林院侍讀尹直主應天試五年己丑命太常寺少卿兼翰林院侍讀學士劉珣翰林院侍讀學士劉吉為考試官取中費閭等廷試賜張昇丁溥董越及第是月改進士張璵費閨陳斌蕭璵梁澤尹龍馮蘭喬惟翰陳紀張晟李价王臣尹仁王錦徐

謙方珪謝顯吳祚為庶吉士命翰林院侍讀學士陳鑑
侍講學士丘濬教習尹龍吏侍旻子也王臣年十六
七年辛卯命左春坊左諭德兼翰林院修撰王獻侍讀
尹直主順天試

命司經局洗馬楊守陳翰林院侍讀徐瓊主應天試
八年壬辰命禮部左侍郎兼翰林院學士萬安司經局洗
馬江朝宗為考試官取中吳寬等廷試賜吳寬劉震李
仁傑及第吳有時名久不第嘗投詩李編修東陽東陽

薦于同列以為其人必狀元也

十一年乙未命詹事府少詹事翰林院侍講學士徐溥
翰林院侍讀學士彭華為考試官華以疾辭改命侍講
學士丘濬取中王鏊等廷試賜謝遷劉戩王鏊及第或曰
鏊以鄉會元有盛名對策復當第一閣老商公抑之置
第三

十三年丁酉命司經局洗馬鄭環翰林院侍講彭教主
順天試

命左春坊左庶子劉健翰林院侍讀周經主應天試

十四年戊戌命禮部尚書翰林院學士劉吉翰林院學士彭華為考試官取中梁儲等廷試賜曾彥楊守陞曾追及第或云閣老萬得彥策擊節歎賞又先一日唱名過視之美而頗長也擢第一陞傳彥老而多髭且短萬意惘然退再取策閱之平平耳踰月改進士梁儲張潔陳璘楊傑敖山劉忠孫珪于材王白劉允中張璞徐鵬王藻鄧煥林霄江瀾張九功陳邦瑞馬廷用荆茂劉機

李經謝文張芮倪進賢楊廷和楊時暢武衛為庶吉士
命翰林院學士王獻謝一夔教習張潔年十七楊廷和
年十九

十六年庚子命左春坊左庶子翰林院侍講學士楊守
陳右春坊右諭德陸簡主順天試

命司經局洗馬羅璟翰林院侍講李東陽主應天試

十七年辛丑命太常寺卿兼翰林院學士徐溥詹事府
少詹事兼翰林院學士王獻為考試官取中趙寬等廷

試賜王華黃珣張天瑞及第

是歲讀卷吏部尹旻以太子太保都察院王越以咸寧伯列內閣太子少保劉珝劉吉下

十九年癸卯命翰林院學士倪岳翰林院侍讀董越主順天試

命左春坊左諭德張昇翰林院侍講商良臣主應天試二十年甲辰命詹事府詹事兼翰林院學士彭華左春坊左庶子劉健為考試官取中儲璫等廷試賜李旻白

錢王敕及第

二十二年丙午命翰林院侍講學士李東陽左春坊左諭德傅瀚主順天試

命右春坊右庶子汪諧左春坊左諭德程敏政主應天試

是年禮部尚書周洪謨等奏本年天下鄉試錄文多乖謬乞將考試官訓導黃奎追奪聘禮行巡按御史提問從之

二十三年丁未命太子少保兵部尚書翰林院學士尹
直右春坊右諭德吳寬為考試官取中程楷等廷試賜
費宏劉春徐瑞及第踰月改進士程楷蔣冕屈伸袁達
黃穆傅珪萬弘璧倪阜華巒吳儼李漢仲裴羅玘蘓癸
鄭炤歐陽鵬伍符翁健之李遜學鄒智石珪李克嗣唐
希介蔡杲毛紀劉丙任儀閻价楊廉潘楷為庶吉士命
右庶子汪諧左諭德溥瀚教習弘璧少師大學士安孫
也父翼為南京禮部左侍郎

是歲尹作試錄序稱宣德丁未大學士楊士奇議會試
取士分南北卷北四南六既而以百乘除各退五為中
數是年以言者又各退二以益中數云

弘治二年己酉命

闕

主順天試

命右春坊右庶子兼翰林院侍講董越左春坊左贊善
張元禎主應天試

三年庚戌命禮部尚書兼文淵閣大學士徐溥詹事府
少詹事兼翰林院侍讀學士汪諧為考試官取中錢福

等廷試賜錢福劉存業靳貴及第

是歲知貢舉禮部右侍郎周經以子病左侍郎倪岳以親屬避詔尚書耿裕知貢舉

五年壬子命左春坊左諭德楊守陞司經局洗馬梁儲主順天試

命左春坊左庶子王鏊司經局洗馬楊時暢主應天試
六年癸丑

少詹事兼翰林院侍讀學士陸簡為考試官取中汪俊

等廷試賜毛澄徐穆羅欽順及第踰月改進士顧清趙
士賢蕭柯沈燾曾瓊吳一鵬楊昇曹璞汪俊周玉黃潤
胡燿王禎任良弼吳舜許天錫薛格陳玉陳陽王崇文
為庶吉士是歲始令先投詩文禮部擇可取者送考命
太常卿兼侍讀學士傅瀚太常少卿兼侍講學士李東
陽教習

八年乙卯命

闕

主順天試

命

闕

主應天試

九年丙辰命詹事府詹事兼翰林院侍講學士謝遷翰林院侍讀學士王鏊為考試官取中陳瀾等廷試賜朱希周王瓚陳瀾及第踰月改進士顧潛陳鳳梧濮韶胡憲張紹泉陳霽楊禔葉德賈詠汪偉王崇獻王九思張弘至徐忱陳琳戴銳陶諧劉銳為庶吉士命詹事府少詹事張昇侍讀學士王鏊教習

十一年戊午命右春坊右諭德王華左春坊左中允楊廷和主順天試

命司經局洗馬梁儲翰林院侍讀劉機主應天試

十二年己未命太子少保禮部尚書文淵閣大學士李東陽掌詹事府事禮部右侍郎兼翰林院學士程敏政為考試官取中倫文叙等廷試賜倫文叙劉龍豐熙及第

是歲給事中華昇林廷玉論敏政鬻題先是敏政問策秘人罕知者其故所昵門生徐經居平日窺得之為其同年解元唐寅說由是各舉答無遺寅踈人也見則矜

且得上第為昇及廷玉所論併敏政下獄按問經自誣服購敏政家人得之又寅曾以一金幣乞敏政文送洗馬梁儲獄成敏政致仕經寅俱充吏一云果敏政家人為之也

十四年辛酉命

闕

主順天試

命右春坊右諭德王華翰林院侍講劉忠主應天試

十五年壬戌命吏部左侍郎翰林院學士吳寬翰林院

侍讀學士劉機為考試官取中魯鐸等廷試賜康海孫
清李廷相及第改進士胡煜魯鐸薛金溫仁和滕霄李
昉趙永李貫畢濟川何塘張檜李元吉周禎王廷相顧
煜潘希曾盛端明朱衮王萱為庶吉士命翰林院學士
梁儲王華教習

是歲禮部尚書傅瀚等各以他事阻吏部左侍郎王鏊
代知貢舉

十七年甲子命

闕

主順天試

命

闕

主應天試

十八年乙丑命太常寺卿兼翰林院學士張元禎左春坊大學士兼翰林院侍讀學士楊廷和為考試官取中董玘等廷試賜顧鼎臣董玘謝丕及第改進士崔銑嚴嵩湛若水倪宗正陸深翟鑒邵天和徐縉張九叙蔡潮林文迪安邦段炅蔡天祐胡鐸高澍馬卿劉寓生安磐穆孔暉李父王韋趙中道黃如金閔楷傅元孫紹先易舒告方獻夫張邦奇為庶吉士張元禎及翰林院學士

劉機教習是歲相傳敬皇帝於內殿焚香籲天願得真才以佐治理

正德二年丁卯命翰林院學士劉春侍讀學士吳儼主順天試

命左春坊左諭德兼翰林院侍讀傅珪侍讀顧清主應天試

三年戊辰命少傅太子太傅戶部尚書武英殿大學士王鏊吏部尚書翰林院學士梁儲為考試官取中邵銳

等廷試賜呂枬景暘戴大賓及第時焦芳子黃中二甲
第一劉宇子仁第四皆逆瑾黨也因刻黃中及三甲第
一人胡纘宗策俱授翰林院檢討改仁及邵銳黃芳為
庶吉士踰月超擢黃中仁及邵銳黃芳為編修黃中再
進侍講而焦芳為題名記盛稱所改之制為當後瑾誅
黃中仁為民銳芳纘宗俱坐貶

或傳會試鎖院後劉瑾以片紙書五十人姓名欲登第
主司不敢拒唯唯而已瑾曰先生輩恐奪賢者路耶即

開科額三百五十人皆上第

五年庚午命翰林院學士傅珪侍講學士毛澄主順天

試

命翰林院侍講學士蔣冕翰林院侍讀朱希周主應天

試

六年辛未命少傅太子太傅吏部尚書武英殿大學士

劉忠吏部右侍郎翰林院學士靳貴為考試官取中鄒

守益等廷試賜楊慎鄒守益余本及第踰月改進士許

承名劉棟張壁應良黃臣尹襄劉朴許復禮費霖王道
張潮祝續王思孫承恩徐之鸞劉泉林文俊孫紹祖戴
顥吳惠金臯劉夔郭維藩田荆張朮王元正陳寰劉濟
張衍慶洗尚文邊憲張鰲山俞敦為庶吉士命靳貴及
翰林院侍講學士蔣冕教習

是歲狀元慎新都公子也或曰新都以子預試請迴避
不允而首相長沙公密以制策題示慎所對獨詳遂首
冠給事御史復論學士貴家人鬻題通賄不報

八年癸酉命翰林院侍講學士吳一鵬左春坊左中允
劉龍主順天試

命右春坊右諭德倫文叙左春坊左中允兼修撰賈詠
主應天試

九年甲戌命少傅太子太傅吏部尚書謹身殿大學士
梁儲翰林院學士毛澄為考試官取中霍韜等廷試賜
唐臯蔡昂黃初及第初貴溪人也朱寧惡大學士費宏
諧於上論其私鄉人罷官

十一年丙子命左春坊左諭德兼翰林院侍講顧鼎臣
主順天試

命翰林院侍講學士李廷相左春坊左諭德兼侍講溫
仁和主應天試

十二年丁丑命太子太保戶部尚書武英殿大學士靳
貴詹事府少詹事兼翰林院學士顧清為考試官取中
倫以訓等廷試賜舒芬倫以訓崔桐及第改進士汪佃
余承勛黃易江暉王廷陳汪應軫劉世盛曹懷儲昱葉

桂章葉式馬汝驥汪思王三錫史于光陳沂鄭顥史道
劉穆楊士雲張星廖嘽蕭與成林時鄭自璧劉世揚曹
嘉閭閭季方湯惟學黎賈席春王邦瑞許宗魯為庶吉
士命禮部尚書兼翰林院學士毛紀及顧清教習

十四年己卯命翰林院侍講學士劉龍右春坊右諭德
豐熙主順天試

命翰林院侍讀學士汪俊右春坊右諭德兼翰林院侍
講李時主應天試

十五年庚辰命禮部左侍郎翰林院學士石琚翰林院
侍講學士李廷相為考試官取中張治等時武廟狩南
京及秋而還辛巳夏月上登極始試之賜楊維聰陸
鉞費懋中及第選進士廖道南王汝璧詹泮鄭一鵬童
承叙黃佐趙廷瑞張夔杜桐葛鴻張治張袞王同祖李
結倫以誠盧渙王用賓陳講李默李春芳吳文之董中
言丁汝夔凡二十五人為庶吉士命掌詹事府尚書兼
學士劉春侍講學士劉龍教習

嘉靖壬午命左春坊左諭德兼翰林院侍讀溫仁和翰林院侍讀穆孔暉主順天試

命右春坊右諭德兼翰林院侍讀董玘翰林院侍讀翟鑾主應天試

二年癸未命少傅太子太傅戶部尚書謹身殿大學士蔣冕掌詹事府吏部尚書翰林院學士石瑄為考試官取中李舜臣等廷試賜姚涑王教徐階及第

四年乙酉命翰林院學士翟鑾左春坊左贊善謝丕主

順天試

命

闕

主應天試

五年丙戌命太子太保禮部尚書武英殿大學士賈詠
詹事府詹事兼翰林院學士董玘為考試官取中趙時
春等廷試賜龔用卿楊維傑歐陽衢及第先是舉人廷
試納卷之日彌封官以會試首列數卷潛送內閣以備
一甲之選或內閣密覘狀頭儀貌及平日有聲者閱卷
官出自東閣歸宿私第是歲禮部尚書席書疏其弊乞

彌封官不得與送讀卷官退朝直宿禮部詔曰可著為
令改進士衮衮陸粲趙時春林雲同金潞張鏊連鑛詹
渼華察屠應琰毛渠王宣王嘉賓鄺忭郭乘聰張渠余
斐江以潮楊恂李元陵王格張鐸為庶吉士明年
十月詔以庶吉士為部屬科道等官而陸居首僅得給
事中其次部屬又次御史其江以潮楊恂為評事李元
陵以下為知縣蓋大學士張璉等意也

七年戊子命左春坊左庶子龔修撰方鵬右春坊右庶

子兼脩撰韓邦奇主順天試

命司經局洗馬張潮主應天試

御史周易言錄文裁改聖經且失體邦奇降南京太僕

寺丞鵬奪俸四月

是歲諸省鄉試用科部等官二人主試

八年己丑命少傅太子太傅吏部尚書謹身殿大學士
張孚敬詹事府詹事翰林院學士霍韜為考試官皆大
禮貴人也張距登進士八年耳初變文格以簡勁為主

其程式文僅三百言云取中唐順之等廷試賜羅洪先
程文德楊名及第先是大學士楊一清等以洪先文德
名及唐順之陳束任瀚六卷進覽上一一品題首卷各
御批於洪先曰學正有見言謹而意必忠宜擢之首者
於文德曰探本之論於名曰能守聖學以為此知要之
說於順之曰條論精詳殆盡於束曰仁智之用著之吾
心此不易之說於瀚曰勉吾敬一之為主忠哉六策以
有御批刻錄中是歲大學士楊一清等考庶吉士以唐

順之任瀚陳東三名為上御批取首列而盧淮諸邦憲
汪大受郭宗臯蔡雲程楊祐汪文淵王表曹忭王穀祥
熊過安如山鄭大同李實孫光輝吳子孝次之居數日
有旨邇年以來每為大臣徇私選取市恩立黨唐順之
等一體除用有才行卓異學問優正者吏部舉奏收之
翰林以備擢用

嘉靖十年辛卯命翰林院侍讀學士吳惠右春坊右贊
善蔡昂主順天試

命翰林院侍讀學士席書左春坊左中允孫承恩主應
天試

是歲各省試仍用科部等官

十一年壬辰命詹事府少詹事兼翰林院學士張潮翰
林侍讀學士郭維藩為考試官取中林春等廷試賜林
大欽孔天胤高節及第先是禮部尚書夏言上疏請正
文體諸刻意騁詞浮誕磔裂壞文體者擯不得取詔可
既廷試言復令儀制郎中約束諸士咸拱聽而大欽獨

後至不聞也起不用對冒而文氣甚奇吏部尚書汪鉉
得之詫曰恠哉以示大學士張孚敬已定二卷覽之曰
雖破格甚明健可誦也取為第三既呈覽上御批第一
大欽時年二十有二第二名孔天胤以王親例補外為
湖廣提學僉事

是歲改庶吉士已取錢亮許樾閔如霖衛元確段承恩
韓鼎扈永通呂光洵謝九儀劉光文黃獻可劉士達劉
思唐闕樸胡守中錢籍王梅雷禮邊潑李大魁郭希顏

矣上閱卷見彌封官姓名疑有私遂報罷後復選呂懷
范瑟錢亮黃應中秦鳴夏邊沆閔如霖王珩衛元確浦
應麒游居敬趙汝濂劉思唐閻樸胡守中李本趙維垣
何城王梅李大魁郭希顏命禮部右侍郎兼翰林院學
士顧鼎臣教習

十三年甲午命翰林院侍講學士廖道南翰林院侍讀
張袞主順天試以初場進題遲下禮部參道南辭鹿鳴
宴不許時吏部尚書汪鉉有子不第上疏指摘場事以

太祖誅劉三吾為言道南引劉儼事答之俱不問

命右春坊右諭德倫以訓右春坊右贊善張治主應天
試

十四年乙未命翰林院侍讀學士張璧侍講學士蔡昂
為考試官取中許穀等廷試賜韓應龍孫陞吳山及第
先是大學士李時等取中十二卷進覽上批答曰卿等
以堪作甲卷十二來呈朕各覽一週其上一卷說的正
合策題夫周道善而備朕所取法其上三說仁禮為用

夫仁基之禮成之亦甚得題意其上四論仁敬夫敬而能仁他不足說可以保治矣其上二畧泛而治於行其下二却似謹雖與題不合言以時事故朕取之可二甲首餘以次挨去不知是否卿可先與鼎臣看一過再同讀卷官看行上復御批首三卷韓應龍曰是題本意可第一甲第一名于孫陞曰說仁禮之意好可第二名于吳山曰敬為心學之極此論好可第三名是歲并李機趙貞吉郭朴教銑任瀛沈宏駱文盛尹臺康大和九人策皆刻

之是年四月內禮部請考庶吉士以故事聞上詔於文
華殿大門外親出御題考試大學士李時曾吏部尚書
汪鏐禮部尚書夏言吏部左侍郎顧鼎臣霍韜右侍郎
張邦奇禮部左侍郎黃綰右侍郎黃宗明選進士李機
趙貞吉教銑郭朴任瀛駱文盛尹臺康大和沈瀚歐陽
暉王立道崧世臣彭鳳鄭一統胡汝嘉林廷機高時黃
廷用奚良輔汪集郭鑒沈良才陳東光王維楨張緒李
秦何維栢盧宗哲全元立趙繼本名上奉旨朕覽趙貞

吉等八名盧宗哲等二十二名可留卿還具題來行內
列吏禮二部堂上官及鼎臣名不必部疏此蓋朕親試
也可作例又陞顧鼎臣為禮部尚書兼翰林院學士教
之後又益以吏部左侍郎翰林院學士張邦奇

十六年丁酉命翰林院侍講學士姚涑左春坊左中允
孫承恩主順天試

命右春坊右諭德江汝璧司經局洗馬歐陽衢主應天
試

初以南京進呈試錄考試官批語失列名下部參看謂
事屬不敬考試提調等官皆當提問議上上謂考官既
不填名策題又以國家祀戎大事為問所對語多譏訕
諭德汪汝璧洗馬歐陽衢令錦衣衛官逮治提調府尹
孫懋府丞楊麒監試御史何鉉沈應陽南京法司究問
考官學正許文魁等所在巡按御史逮問所取生儒不
許會試後謫汝璧為廣東市舶副提舉衢為南雄府通
判

禮部尚書嚴嵩奏廣東所進試錄字如聖謨帝懿四郊
上帝俱不行擡頭及稱陳白沙倫遷岡之號有失君前
臣名之義且錄中文體大壞詞義尤為荒謬宜治罪得
旨學正王本才等布政陸杰等按察司蔣淦等俱命巡
按官逮問本才等奪其禮幣御史余光命法司逮問仍
通行天下提學官嚴禁士子敢有肆為怪誕不遵舊式
者悉黜之

十七年戊戌命太子太保禮部尚書掌詹事府事翰林

院學士顧鼎臣太子賓客吏部左侍郎翰林院學士張
邦奇為考試官取中袁煒等廷試賜茅瓚羅珪袁煒及
第

是歲內閣初擬舉人陸師道為狀元御筆批作二甲第
五取袁煒第一文華宣讀已出復召大學士李時夏言
學士顧鼎臣入改作第三親擢茅瓚第一見陸詹事深
家書中

十九年庚子命左春坊左庶子童承叙右春坊右庶子

楊維傑主順天試

命翰林院學士張治右春坊右諭德龔用卿主應天試
二十年辛丑命掌詹事府禮部尚書翰林院學士溫仁
和翰林院侍講學士張袞為考試官取中林樹聲等廷
試賜沈坤潘晟邢一鳳及第改進士高儀董份嚴訥高
拱梁紹儒熊彥臣晁璫林樹聲陳陞裴宇陳以勤王材
徐養正潘仲驂楊宗氣王顯忠何雲鴈張鐸王交徐南
金忭林懋和王三聘王言何光裕萬士和葉鏜夏子開

為庶吉士命仁和及太子賓客吏部左侍郎翰林院學士張潮教習

二十二年癸卯命左春坊左中允秦鳴夏左贊善浦應麒主順天試

命翰林院侍讀華察右春坊右中允閔如霖主應天試上覽山東所進鄉試小錄手批其第五問防邊禦敵策曰此策內含譏訕禮部其參看以聞于是尚書張壁等言今歲敵未南侵皆皇上廟謨詳盡天威所懾乃不歸

功君上而以敵人饜飽為詞誠為可惡考試官教授周
鑛李弘教諭劉漢陶悅胡希顏程南吳紹曾葉震亨胡
僑率意為文叛經訕上法當重治監臨官御史葉經漫
無糾正責亦難辭其提調官布政使陳儒參政張梟監
試官副使談愷潘恩均有贊襄之職俱屬有罪上曰各
省鄉試出題刻文悉聽之巡按考試教官莫敢可否此
錄不但策對含譏即首篇論語義繼體之君不道葉經
職司監臨事皆專任并同鑛等陳儒等俱令錦衣衛差

金史卷八十二
官校逮繫至京治之尋逮經儒臬愷恩至上以經狂悖
不道命廷杖八十為民乃降儒等邊方雜職經遂死于
杖下及補儒等為宜君等縣典史尋貴州試錄至亦以
忤旨御史為民右參政等各降三級

初順天鄉試歲多冒籍中者慈谿人張汝濂易名張和
冒良鄉籍禮科給事中陳斐劾奏之因歷陳京闈之弊
其劾謂國家求賢以科目為重而近年以來情偽日滋
敢于為巧以相欺工于為黨以相蔽其中奸宄之徒或

居家之時恃才作奸敗倫傷化削籍為民兼之負累
亡命變易姓名不敢還鄉者有之或因本地生儒衆多
解額有限窺見他方人數頗少逃奔入京投結鄉里
交通勢要鑽求詭遇者有之或以順天鄉試多四海
九州之人人不相識暮夜無知可以買托代替者有
之一遇開科之歲奔走都城尋覓同姓假稱宗族賄
屬無恥鄉官拴同保結不得府學則謀武學不得京師
則走附近不得生員則求儒士百孔營求冀遂捷徑

及其中科回籍則既告路費又告牌坊四顧罔利真
同登壠而其未得者則從旁挾持互相攻發蜂起浮議
呈帖匿名聖明輦轂之下豈宜有此不美之事請令所
司覈究順天府學冒籍生員俱遣回籍降等肄業京衛
武學非武職應襲不得濫入歲貢援例監生如舉人教
官會試例止得一入京闈後但本省應試而京闈鄉試
如各省法唱名辨驗不得混冒庶乎前弊可革得旨錢
仲實張和下法司逮治冒籍生員提學御史覆勘餘俱

下禮部會議給事中李念疏論工部侍郎陸杰從子光祚太僕寺卿毛渠子延魁鴻臚寺卿陳璋子策冒京衛順天二學中式劾杰等欺罔不忠提學御史謝九儀以被訐冒京衛順天二學中式鄭夢綱等十人論奏俱下禮部行所司覈其真偽至是議上謂孫鏹孫鏞王宸陸宏共四人係錦衣衛太醫院見任官的親子姪當存留會試鄭夢綱陶大壯沈譜丁子載陸可成翟鍾玉共六人俱詐冒籍貫當發回原籍入學肄業仍得應鄉試其

陸光祚陳策毛延魁雖稱隨任終屬冒籍亦當一體發
回得旨孫鑑等鄭夢綱等俱依擬陸光祚等姑准存留
不許對制陸杰陳璋毛渠俱貸之明年言官復摘左贊
善浦應麒賣題事下獄杖之六十并舉人翟鍾玉等俱
為民又以取中翟汝孝汝儉并左中允秦鳴夏俱逮捕
奪職

冬十一月南京河南道御史包孝奏辛丑會試以禮部
尚書溫仁和主試翰林院編修嵇世臣為禮經分考賄

中進士徐履祥陳志潘仲驂當追罷且言左庶子童承叙之嗜酒右贊善郭希顏之輕險編修袁煒之放蕩俱不當與試事下吏部覆得旨俱勿論

二十三年甲辰命太子賓客禮部尚書兼翰林院學士張潮左春坊左庶子江汝璧為考試官時潮入貢院三場畢以病死輿屍出考試唯江一人而後序則屬同考修撰茅瓚是歲取中瞿景淳等廷試賜秦鳴雷瞿景淳吳情及第而少傅翟鑾二子汝儉汝孝俱與焉少傅以


嫌故辭讀卷不許既試以進呈卷上上疑汝儉等在首
甲因抑第一卷寘第三復抑第三卷寘二甲第四拆卷
果汝孝也上又夢聞雷遂拔鳴雷為狀元

刑科給事中王交王堯日論劾少詹事江汝璧修撰沈
坤編修彭鳳歐陽暎署員外郎高節朋私通賄大壞制
科大學士翟鑾以內閣首臣二子汝儉汝孝既聯中鄉
試又連中會試若持券取物然崔奇勲乃汝儉等師焦
清與汝儉結嬖又同受業四人者會試俱一號汝儉汝

孝竒勲皆彭鳳所取詩經考官五人何俱在鳳一房歐陽暉亦汝儉等師本同經又改看書經跡若引嫌而陰助鳳尋卷及沈坤之取中陸煒高節之取中彭謙汪一中皆以納賄故乞明正其辜且欲追順天鄉試主考秦鳴夏浦應麒阿奉翟鑾之罪上下其章吏部都察院從公參看鑾隨具疏自理且請特降題目命部院大臣覆試上怒曰鑾被劾有旨參看乃不候處分肆行擾辯屢屢以直無逸為辭同夏言禁苑坐轎止罪一人全不感

懼敢以撰科文贊立修為欺朕內閣任重不早赴以朕
不早朝並君行事二子縱有軼轍之才豈可分明並用
恣肆放僻如此部院其參閱治罪不許回護部院覆請
下汝璧于理嚴究分別情罪輕重上以跡弊明顯大壞
祖宗取士之制遂勒鑒并汝儉汝孝奇勲清及鳳喚俱
為民汝璧等俱下鎮撫司逮問已法司會鞫謂汝璧鳴
夏應麒雖各阿取輔臣之子然實非賄故坤之取煒節
之取一中亦然獨彭謙實以校尉張岳賄節五百金而

中監察御史王珩沈越失於糾察罪亦難逃疏上詔杖
汝璧鳴夏應麒六十草職閒住不叙珩越降一級調外
任節岳充軍謙為民坤一中煒存留供職



弇山堂別集卷八十二